

Introduzion de Gigi Pessati

Mi no go fato le scuole alte, a so' solo on sartore de paese: alora me scusarì sa scrivo in dialeto. Me xe sta dito che, sto ano, fà zento che la Ostaria ca go verto mi la xe in andamento. Mi a ghea perso el conto...

E pensare, vero Marieta, ca piràvino co jera ora de decidarse. El jera on passo grande che on sartore se metesse a fare l'osto; ghe volea corajo, anca parché alora no ghe jera tanta zente che ghea da spendare in Ostaria.

E invezze, varda ti, a volte che se discore...

Ghe xe du nostri neudi che tien verto el locale e che lo ga portà a compìre zento ani. El nostro Toni ga fato on bel laoro, sia a portarse casa la Dina che a fare di bravi tusi che ga continuà la nostra fadiga. Parché, ca no credì che sia fato a fare l'osto!

Mi a so' comosso, e ti, Marieta?

No te vien i oci lustrì a védare la nostra Ostaria che la xe ancora in piè, e piena de joventù.

Xe sta proprio na benedission decidarse e, desso, so pì convinto de alora.

Cossa dito, Marieta: ca ghe auguremo nantri zento ani ala nostra creatura?

Si, Gigi, chissà ca la vedemo ancora fra zento!